

**dalla radunonza generala dalla Surselva Romontscha (SR),
venderdis, ils 27 d'uoost 2021, allas 19.30
en scola veglia a Flem**

Tractandas:

Presentaziun d'il cudisch «Oranja» da Stella Sennhauser

1. Avertura e beinvegni
2. Tscharna dils dumbravuschs
3. Protocol
4. Rapport annual 2020
5. Rendaquen 2020
6. Fixar la contribuziun annuala
7. Elecziuns
8. Revisiun dils statuts
9. Ulteriuras informaziuns
10. Program da lavur 2021/22
11. Varia

Presentaziun dil cudisch «Oranja» da Stella Sennhauser

Avon la radunonza generala presenta Stella Sennhauser siu empren cudisch da fantasia «Oranja». Il cudisch tracta dalla giuvna Oranja che vegn onns alla liunga trenada el zuppau da Heron. Ella empren da cumbatter e da survivor. Pér cu ils schuldaus dil retg – in retg che haveva instituiu sesez – sblundregian Heron, intervegn ella il ver motiv da sia scolaziun e la verdad da sia derivonza. Oranja ei surprida e surdumandada da sia nova responsablada. Perquei eis ella fetg engrazieivla d'anflar sustegn dil giuven guerrier Tharon. Suenter lur emprova zun riscada da salvar Heron, para tut dad esser piars. Mo gest cu ei fa la pareta ch'Oranja ei buca capavla da dumignar ils pensums che siu destin pretenda dad ella, anflan els dus ina nova alianza. Communablamein cun lur novs cumpogns semettan Oranja e Tharon sin via per liberar lur pievel ord la tirannia dil crudeivel retg.

Per la translaziun romontscha dil cudisch billing sursilvan-tudestg segna Sabina Candinas-Caduff. La vernissascha ei vegnida embellida cun il cant dad Ester Deck. Grond engraziament a tut tgi che ha collaborau. Il cudisch ei en vendita tier la Lia Rumantscha e tier l'autura.

1. Avertura e beinvegni

Il president dalla SR Alberto Palaia arva la radunonza fagend in cordial beinvegni a tuts presents.

Il president ha retschert differentas perstgisas. Ellas vegnan prelegidas e pridas per enonuschientscha.

La gliesta da tractandas ei vegnida publicada el Fegl ufficial dalla Surselva ed ella Ruinaulta. Las commembras ed ils commembers han retschert las tractandas per posta. La gliesta da tractandas vegn approbada unanimamein.

Gion Caprez, che representa la vischnauna burgheisa da Flem, beneventa medemamein ils presents. El presenta cuortamein ils impurtonts fatgs davart Flem.

2. Tscharna dils dumbravuschs

Adrian Cathomas vegn elegius sco dumbravuschs.

3. Protocol

Il protocol dalla radunonza generala 2020 ei publicaus silla pagina d'internet dalla SR, www.surselva-romontscha.ch. Tresa Deplazes giavischa pertuccont sia proposta tier la strategia dalla Ligia Romontscha ina pintga amplificaziun vid il protocol. Risguardond la proposta da Tresa vegn il protocol approbaus unanimamein.

4. Rapport dil president, settember 2020 - zercladur 2021

Persunalias:

Suenter la demissiun da nies assessur Marc E. Solèr ha ei dau ina midada ella suprastonza dalla Surselva Romontscha. A caschun dalla davosa radunonza generala ei ina nova commembra da suprastonza vegnida elegida, Andrea Sandova.

La suprastonza ha ussa ils suandonts commembers:

president: Alberto Palaia

actua e vicepresidente: Rita Bearth

cassiera: Flurina Cantieni

assessura: Nadja Huonder

assessura: Andrea Sandova

Marc Elias Solèr ei vinavon responsabels per nossa pagina d'internet. Allas sesidas da supratsonza ein era mintgamai Donat Nay (suprastont dalla Ligia Romontscha/representant dalla SR) ed in promotur regional dalla LR (David Flepp ni Alice Bertogg) presents.

Dapi la radunonza generala dil davos onn ha la suprastonza giu 8 sesidas regularas ed ina sesida sur video. Las sesidas regularas han dapi plirs onns mintgamai liug els locals dalla LR a Glion.

Marcus Holderegger e Nicole Casaulta han sin uonn demissiunau sco revisurs da quen. Duront biars onns han els fatg ina lavur cunscienziusa en favur da nossa uniun. In grond dieuspaghi persuenter. Ils successurs vegnan elegi oz. Vinavon ha la SR encuretged ed anflau in suppleant revisur da quen per la Ligia Romontscha. Marcus Beer ha surpriu quei post dapi l'entschatta 2021. Engraziel fetg ad el per sia promptadad da sorprender quell'incarica.

Dapi igl 1. da zercladur ei Diego Deplazes ufficialmein il niev secretari general dalla Ligia Romontscha. Nus vein giu grond plascher da sia elecziun e giavischein ad el ed a tut ils collaboraturs dalla LR bien success.

En dus meins ei l'elecziun dil presidi dalla LR. Lu vegn la squadra ad esser completada. Al president dalla LR partent Johannes Flury engraziein nus da cor per tut sia lavur duront ils davos sis onns e giavischein ad el e sia famiglia tut bien pil futur. Secapescha sperein nus che Johannes resti vinavon commember dalla Surselva Romontscha.

Onn da lavur 2020-2021

Malgrad il temps da pandemia vein nus giu in onn plein lavur. La SR ha luvrau vid agens projects, sco la finiziun dil cudisch biling «Oranja» e l'ediziun giubilara da «Nies Tschespet» che cumpara egl october. Differents texts da tredisch auturas ed auturs cumparan en quei cudisch che vegn presentaus denter auter era als dis da litteratura. Ulteriuras vernissaschas ein planisadas. Tschien onns suenter igl emprem «Tschespet» egl onn 1921, igl onn dil 150avel onn da naschientscha da Flurin Camathias e sil 75avel dall'Uniun da Litteratura ei quei in'ediziun fetg speciala. El mument luvrein nus aunc vid ina reediziun da «Miu gidonter» che vess da cumparer l'entschatta 2022.

La SR ha astgau sustener numerus projects, differentas publicaziuns da cudischs e purtaders da tun. La gliesta completa suonda el rendaquen.

Fetg bia energia ei vegnida impundida per anflar candidatas e candidats pil presidi dalla LR. Cun la brev als commembers havein nus denter auter fatg in appel a tuttas ed a tuts interessai da s'annunziar ni da far propostas. Il sinzur ei staus fetg mudests, aschia ch'ils treis presidents dallas uniuns territorialas, UdG, URGC e SR, han formau in comité ed han activamein encuretg candidatas e candidats. In grond engraziament va a Gierina Michael, co-presidenta dalla Uniun romontscha Grischun central ed a Hermann Thom, president dall'Uniun dils Grischs. Nus essan tuts perschua di ch'il proxim president, respectivamein la(s) proxima(s) presidenta dalla Ligia Romontscha, vegni ad esser ina persuna cumpetenta, motivada e constructiva e selegrein sin ina buna collaboraziun els proxims onns. L'elecziun ei ils 30 d'october a caschun dalla radunonza da delegadas e delegai dalla LR a Sent.

Pagina d'internet e leporello

Sin nossa pagina san tuttas e tuts perseguitar ina buna part da nossa lavur. Denter auter anfleis vus cheu nossas publicaziuns sco era projects ch'ei vegni susteni dalla Surselva Romontscha.

La finamira dalla pagina, che ha ussa era ina part en engles, franzos, talian e tudestg, ei da render attents sin nossas activitads, denton era da gudignar novas commembras e novs commembers, independentamein da lur origin e lur liug da dimora.

Bugen envidel jeu Vus tuts ad ecurir novas commembras e novs commembers. Cun ina mudesta contribuziun da 30.- san singulas e singuls sustener projects e publicaziuns en favur dil romontsch. Nus vullessen uonn era introducir novas fuormas da commembradi. Nossa proposta leutier fagein tier tractanda 6.

Sin nossa pagina anflan ins era in formular electronic per far damondas da sustegn. Naturalmein san ins era far talas damondas sin pupi e per posta.

Cuors da romontsch sursilvan a Glion

Quei cuors ei in pilaster impurtont per render il romontsch pli enconuscents e per purtar nies lungatg els tgaus e sillas levzas dad adina dapli persunas da tut la Svizra e digl exteriur. Per quei motiv sustetgn la SR cun perschuasium il cuors finanziamein e cun

divers schenghetgs. El fenadur ha il cuors puspei saviu vegnir organisaus. Engraziel fetg alla Fundaziun Retoromana (FRR) per tut las stentas en quella direcziun.

Strategia LR

La versiun finala dalla strategia ei vegnida finalisada suenter l'elecziun dil niev secretari general ed ei ida en consultaziun al cussegl dalla Ligia. Jeu sun perschadius che la strategia seigi in bien pupi da lavur per las sfidas dils proxims onns. Cordial engraziament allas commembras ed als commembers che han inoltrau propostas per midadas. Ina part da quellas propostas ein vegnidas risguardadas ella versiun actuala ch'ei vegnida discutada e finalisada el Cussegl dalla LR.

Propostas da mesiras per promover ils lungatgs el Cantun GR

Ei vegn differenziau denter propostas per ordeifer (total 35) ed enteifer (47) il Cantun Grischun e denter talian e romontsch. Cun quellas propostas e la strategia dalla Ligia Romontscha ein biaras ideas e plans sin meisa. Per l'execuziun da quellas propostas ein differents organs, differentas instituziuns, mo era mintga singula persuna dumandai. Ei tonscha buc cun mo haver propostas sil pupi. Quellas ston era vegnir realisadas. Il document ei d'anflar sin nossa pagina d'internet.

Manifest(o) GR3 - per 3 linguas

La deputazione grigionitaliana del Gran Consiglio e la Gruppa romontscha dil Cussegl Grond han inoltrau alla regenza in manifest per rinforzar la coesiun denter las cuminonzas linguisticas.

La regenza ha en ina cuorta risposta "appreziau" igl engaschi dallas parlamentarias e dils parlamentarisch ed appellau ad ina collaboraziun denter parlament e regenza. Denter auter va ei per il diever dils lungatgs cantunals duront las radunonzas, il diever dils lungatgs ellas dertgiras ed el service public e la formaziun. Il document ei d'anflar sin nossa pagina d'internet.

Discussiun dil «Plaun»

Aunc adina actuala ei la discussiun entuorn il Plaun. Quei ei in aschinumnau «work in progress», jeu sun denton perschadius che nus vegnin ad anflar sligiazziuns che corrispundan als giavischs da tut las partidas involvadas, adina egl interess dil romontsch.

Engraziament

Per finir resta ei a mi dad engraziar a vus tuttas e vus tuts, allas commembras dalla suprastonza, a Donat Nay, representant dalla SR ella suprastonza dalla Ligia, a Gion Caprez, president dalla vischnaunca burgheisa da Flem ed al Flimserstein Raceteam da Flem per l'organisaziun da questa sera.

Glion, uost 2021

Alberto Palaia
president SR

Il rapport dil president vegn approbaus unanimamein.

5. Rendaquen 2020

La cassiera Flurina Cantieni presenta ils differents sustegnns finanzials e silsunter il quen. Ella explichescha detagliadamein las singulas posiziuns. Il quen siara cun entradas da 42'665.50 ed expensas da 42'776.51, pia cun ina sperdita da 111.01.

Duront igl onn 2020 ha la Surselva Romontscha approbau ils suandonts sustegnns finanzials :

- ⇒ Cuort Ligia Grischa Trun
- ⇒ biblioteca da Glion
- ⇒ Galiots, disc cumpact
- ⇒ musica Vignogn, cronica
- ⇒ festivtads 150 onns Gion Flurin Camathias
- ⇒ Chasa Editura, Giachen M. Nay
- ⇒ disc cumpact d'affons, Hoppelihopp
- ⇒ Ligia Grischa, disc cumpact
- ⇒ Fundaziun calender per mintga gi
- ⇒ Pascal Gamboni, cudisch e disc
- ⇒ sutga romontscha a Laax
- ⇒ Compagnia SuPerGiu Teatro, teater pluriling
- ⇒ Martin Fontana, sclaridas bufatgas
- ⇒ Aurelius & Sirius, disc cumpact

Cunquei ch'ils revisurs ein buca presents vegn il rapport dils revisurs da quen, Nicole Casaulta e Marcus Holeregger, projectaus. El rapport proponan ils revisurs d'approbar il quen sco presentaus. Il president tschenta en votaziun il quen, il qual vegn approbaus unanimamein.

6. Fixar la contribuziun annuala

La suprastonza propona d'adattar las contribuziuns sco suonda:

	commembradi singul:	CHF 30.-
niev:	commembradi partenaris:	CHF 50.-
niev:	commembradi da famiglia:	CHF 50.-
	secziuns/pleivs/uniuns:	CHF 50.-
	persunas giuridicas:	CHF 100.-

La radunonza accepta unanimamein la proposta dalla suprastonza.

Plinavon fa Tresa Deplazes la proposta ch'ils commembradis da famiglia dueigien valer entochen 25 onns, sch'ils affons habiteschien el medem tenercasa. Quella proposta vegn acceptada cun 11 encunter 6 vuschs.

Las contribuziuns per vischnaucas ein vegnidadas fixadas egl onn 2019 per in cuoz da 5 onns e stattan quei onn buc en votaziun.

7. Elecziuns extraordinarias

Sin gliesta stat la renominaziun da Donat Nay sco representant dalla SR ella Ligia Romontscha. La suprastonza schazegia fetg che Donat stat vinavon a disposiziun sco representant. En quei connex engrazia la suprastonza a Donat per sia veramein prima lavur ch'el fa onn per onn per nus ed en favur dil romontsch. Donat semetta adina en fetg per nos basegns e contribuescha fetg bia allas discussiunas duront las sesidas da suprastonza dalla Surselva Romontscha, nua ch'el ei adina dalla partida e sustegn nus nua ch'igl ei mo pusseivel. La radunonza renconuscha quei engaschi cun in applaus. Donat Nay pren il plaid ed engrazia era da sia vart per la buna collaboraziun.

Per quei motiv sustegn la suprastonza bugen quella candidatura e propona secapescha ina reelecziun. Donat vegn elegius unanimamein per ina proxima perioda d'uffeci.

En in proxim pass vegn cuntinuau cull'elecziun dils revisurs da quen. La suprastonza fa la proposta d'eleger René Buchli e Beat Pfister sco novs revisurs da quen. Nus essan leds d'haver anflau els ed essan engrazieivels ch'els han dau suatientscha a nossa damonda.

Rene Buchli e Beat Pfister vegnan medemamein elegir unanimamein sco novs revisurs da quen.

Tier ils delegai e las delegadas dat ei quei onn neginas midadas.

Ladina Friberg (Danis) ha demissiunau sco suppleanta dalla Surselva Romontscha. Novs suppleants e novas suppleantas vegnan elegi en rama dallas elecziuns ordinarias.

In engraziel fetg a tut las persunas che stattan a disposiziun per promover il romontsch enteifer las retschas dalla Surselva Romontscha.

8. Ulteriuras informaziuns

Revisiun dils statuts dalla Surselva Romontscha (SR)

La davosa versiun dil statuts ein vegina approvada dalla radunonza da fundaziun dils 18 da mars 2006.

La radunonza generala dils 27 d'uost 2021 ha approvau ina revisiun parziala dils statuts tenor las suandontas indicaziuns:

[Propostas per revisiun parziala]

[Vegn strihau]

[Niev egl entir text: Surselva Romontscha scret cun R-grond]

art. 1 Las denominaziuns da persunas valan per omisduas schlatteinas.	<i>Egualitad da schlatteina</i>
art. 2 La Surselva Romontscha (SR) ei in'uniun tenor art. 60 ss. dil Cudisch civil svizzer. L'uniun regionala ei affiliada all'uniun tetgala dalla Romontschia, alla Ligia Romontscha.	<i>Num</i>

<p>art. 3 La Surselva Romontscha cumpeglia igl intschess romontsch dalla Regiun Surselva e dil Plaun. Far part dall'uniun san era personas domiciladas ella diaspora che sesentan ligiadas culla Surselva e cul Plaun ni culla Romontschia en general.</p>	<p><i>Territori</i></p>
<p>art. 4 Igl intent dalla Surselva Romontscha ei da mantener e promover il lungatg e la cultura romontscha.</p>	<p><i>Intent</i></p>
<p>art. 5 La Surselva Romontscha consista da:</p> <ul style="list-style-type: none"> ● personas singulas e personas giuridicas ● vischnauncas e pleivs ● secziuns localas (cerchels culturals) ● secziuns da giuventetgna ● uniuns ● commembers d'honor <p>La contribuziun annuala per las singulas categorias vegn fixada dalla radunonza generala. Commembers che pagan buca la contribuziun annuala piardan il commembradi.</p>	<p><i>Commembradi</i></p>
<p>art. 6 La Surselva Romontscha promova ensemens culs promoturs regionals dalla LR la fundaziun da secziuns localas e sestenta d'haver en mintga vitg ina persona da contact (gerau da cultura / cauvitg).</p>	<p><i>Secziuns localas e cauvitgs</i></p>
<p>art. 7 Ils organs dalla Surselva Romontscha ein:</p> <ul style="list-style-type: none"> ● la radunonza generala ● la suprastonza ● il revisorat 	<p><i>Organs</i></p>
<p>art. 8 Ils mieds finansials dalla Surselva Romontscha derivan:</p> <ul style="list-style-type: none"> ● dalla contribuziun annuala dalla LR ● dallas contribuziuns dils commembers ● da donaziuns 	<p><i>Mieds finansials</i></p>
<p>art. 9 La radunonza generala ei igl organ suprem dalla Surselva Romontscha. Ella vegn convocada silmeins ina gada ad onn. La suprastonza ni 30 commembers san pretender ina radunonza generala extraordinaria. Dretg da vuschar han commembers che han cumplenu il 16avel onn da naschientscha.</p>	<p><i>Radunonza generala</i></p>
<p>art. 10 La radunonza generala dalla Surselva Romontscha ha liug ina ga ad onn el decuors dalla primavera ed ei da comunicar els Fegls</p>	<p><i>Publicaziun</i></p>

<p>ufficials silmeins 15 dis avon la radunonza. Ils commembers vegnan envidai persunalmein.</p>	
<p>art. 11 Las incumbensas dalla radunonza generala ein:</p> <ul style="list-style-type: none"> ● fixar la strategia dall'uniun ● fixar il program d'activitad ● eleger presidi e suprastonza ● eleger il revisorat ● eleger delegadas e delegai dalla LR ● nominar la representanza ella suprastonza dalla LR ● approbar il protocol ● approbar il rapport da gestiun ed il rendaquen ● fixar la contribuziun annuala ● nominar commembers d'honor e renconuscher merets specials 	<p><i>Incumbensas e cumpetenzas dalla radunonza generala</i></p>
<p>art. 12 La perioda d'uffeci cuoza treis onns.</p>	<p><i>Perioda d'uffeci</i></p>
<p>art. 13</p> <ul style="list-style-type: none"> ● La suprastonza dalla Surselva Romontscha secumpona da minimum 5 commembers. ● Il president vegn eligius dalla radunonza generala, l'ulteriura suprastonza seconstituescha sezza. ● Il representant dalla Surselva Romontscha ella suprastonza dalla LR fa automaticamein part dalla suprastonza regiunala. 	<p><i>Suprastonza</i></p>
<p>art. 14 La suprastonza ei igl organ executiv. Ella execuescha sia lavur tenor statuts, tenor il program da lavur. El fixescha en atgna cumpetenzza il preventiv. Ella representa la Surselva Romontscha anoviars. Ella reparta la lavur en resorts e sa installar cumissiuns ni surdar incaricas specialas.</p>	<p><i>Incumbensas e cumpetenzas dalla suprastonza</i></p>
<p>art. 15 La suprastonza vegn convocada dil parsura tenor basegns ni sche treis commembers giavischan. Las decisiuns vegnan pridas cun maioritad semplia. La suprastonza sa envidar il menader dil center regional ils promoturs regiunals dalla LR cun vusch consultativa allas sesidas da suprastonza.</p>	<p><i>Sesidas</i></p>
<p>art. 16 Il quen da gestiun vegn serraus cun la fin digl onn calendar. Ils revisurs controlleschan l'administraziun e revedan il quen. Els rapportan en scret alla radunonza generala.</p>	<p><i>Revisorat</i></p>
<p>art. 17</p>	

<p>10 % dils 30 commembers san inoltrar a scret ina iniziativa alla suprastonza. Quella sto vegnir tractandada alla proxima radunonza generala. Scadin commember sa recuorer tier la radunonza generala encunter ina decisiun dalla suprastonza. Iniziativa e recuors ston vegnir inoltrai silmeins treis dus meins avon la radunonza generala.</p> <p>A caschun dalla radunonza generala astgan singuls commembers inoltrar sut la tractanda varia propostas. Sut varia vegn denton priu negina decisiun. Sche necessari vegn quella proposta tractandada u en suprastonza, ni a caschun dalla proxima radunonza generala.</p>	<p><i>Iniziativa e recuors</i></p>
<p>art.18 La Surselva Romontscha sa vegnir dissolvida cun 2/3 dallas vuschs dils presents cun dretg da vuschar. En cass d'ina dissoluziun duei la facultad dall'uniun vegnir deponida per 20 onns tier la LR. Renescha l'uniun ni vegn ina nova uniun cun intents paregliabels fundada duei la facultad vegnir surdada a quell'organisaziun. Cass cuntrari croda la facultad alla LR.</p>	<p><i>Dissoluziun</i></p>
<p>art. 19 Quests statuts ein vegni approvai dalla radunonza da fundaziun dalla Surselva Romontscha (SR) dils 18-03-2006 a Glion. Els remplazzan ils anteriurs statuts dalla Romania e dalla Renania ed entran en vigur cun l'approbaziun entras la LR. Per ina revisiun totala da quests statuts basegna ei la maioritad da 2/3 dils commembers che vuschan.</p>	<p><i>Vigur e revisiun</i></p>

Presidi Lia Rumantscha

Il president dalla SR declara il process d'anflar candidatas e candidats pil presidi dalla LR. Sin basa dils statuts dalla LR eis ei definau che las uniuns territorialas (SR, UdG e URGC) inoltreschan lur propostas. Ils presidents dallas 3 uniuns territorialas (Hermann Thom, Gierina Michael ed Alberto Palaia) han collaborau culla finamira d'haver 3 candidat(a)s, per allura era dar la pusseivladad d'eleger. Igl ei stau central d'haver negin cumbat denter las regiuns, neginas preferenzas da derivonza dil territori, dalla confessiun ed era buc dalla schlatteina.

Gest suenter la davosa radunonza generala ha la suprastonza dalla SR contactau ils commembers. Plirs appels ein vegni fatgs e pliras propostas ein vegnidas inoltradas p.m. dils presidents. Relativamein bauld ha Urezza Famos signalisau interess pil presidi. El decuors dils davos 8 meins ein differentas propostas vegnidas fatgas. Propostas ch'adresseschan umens sco era dunnas. En quei connex han differentas sesidas dils presidents dallas uniuns territorialas giu liug. Ils presidents han contactau e discurreu cun ca. 20 candidat(a)s. Allura ha era Gianna Luzio mussau interess pil post en discussiun. La radunonza generala dall'UdG e URGC el zercladur ha contribuìu neginas novas propostas. Fin fenadur/entschatta uost han Urezza Famos e Gianna Luzio fatg la proposta da star a disposiziun per in co-presidi. Ellas ein sentupadas a Sent per eruir sch'in co-presidi vegness en damonda. Lur facit ei stau in gie. Ils presidents dallas uniuns territorialas ein danovamein sentupai, discussiunau la situaziun e decidu da

sustener e da proponer il co-presidi alla radunonza da delegai dalla Ligia Romontscha. Suentier in onn lavur dat ei (mo) quella proposta. Leutier uneschan ellas bunas cumpetenzas naven dil marketing entochen tier las relaziuns e la reit politica, sco las habilitads da menar. Ord lur dimora ella Bassa enconuschan ellas era la diaspora. El decuors dallas proximas jamnas ha ina sesida cun il president actual dalla Ligia Romontscha, il secretari general, la suprastonza LR ed ils 4 presidents dallas uniuns territorialas liug. Franc sto in niev concept dad in co-presidi vegnir discussaus. Ils 8-9-2021 ha la sesida dil cussegl dalla LR liug, silsuentier ils 22-10-21 la sesida preparatorica culs delegai dalla SR ed allura ils 30 d'october la radunonza da delegai dalla Ligia Romontscha. Alberto Palaia fa in cordial beinvegni allas candidatas presentas, Urezza Famos e Gianna Luzio. Ellas sepresentan alla radunonza. Urezza Famos ei oriunda da Valsot. Ella ei editura dil Piz Magazin sco era dil Zürichseemagazin. Gianna Luzio ei oriunda da Savognin ed ei secretaria generala dall'Allianza dil center. Ellas constateschan duront lur presentaziun: "Nus havein energia e stein bein sin quater combas. Nus havein l'impressiun che nus sappien ademplir quell'incarica". Ord il ravugl dalla radunonza generala ei vegniu negianas objecziuns e damondas, aschia ch'ins astga trer la conclusiun ch'ins s'accordi cun quella proposta.

9. Program da lavur 2021/22

Il Tschespet 2021, nr. 78 - L'ODUR DALLA TIARA

Cul Tschespet nr. 78 festivescha la Surselva Romontscha il giubileum da 100 onns Tschespet. L'ovra vegn ad haver il tetel "L'odur dalla tiara". Ei setracta d'ina collaboraziun cun auturs ed auturas contemporanas (cun excepziun da Theo Candinas e Flurin Camathias) che han contribuìu texts da lirica e prosa. El proxim onn havein nus planisau pliras vernissaschas per presentar il niev cudisch.

Miu Gidonter

Il cudisch „miu gidonter“ digl onn 1977 ei exausts e la SR ha priu la decisiun da surluvrar el. Laura-Alessia Arpagaus vegn a surluvrar il cudischi en rama da sia lavur interdisciplinara. La Surselva Romontscha sustegn ella tier quella lavur.

Il cudisch dil 1977 cuntegn ell'emprema part ina gliesta da plaids romontschs tenor alfabet. La secunda part cuntegn maletgs en ner ed alv cul vocabulari corrispudent. Ils maletgs ein buca pli adattai per ina restampa.

Il cudisch niev sedrezza en emprema lingia a glied carschida che secasa en nos vitgs ni personas ch'ei interessadas d'emprender sursilvan (cuors da stad FRR, cuors LR, Café rumantsch...). Cunquei ch'il cudisch cuntegn in vocabulari fundamental sa el era vegnir duvraus en scola.

Il cudisch cuntegn 50 paginas tematicas cun fotografias ed in vocabulari corrispudent. Il vocabulari duei esser fundamentals e sper il sursilvan era cuntener la translaziun tudestga. In vocabulari tenor alfabet ei buca dispert necessaris.

Pil maletgs ei la sligiziun optimala da cumprar fotografias ni graficas da licenza. Ils cuosts persuerter ein fetg mudests.

Miu gidonter vegn a sepresentar en in format A4 cun ina cuviarta loma sco entochen uss.

Ideal fuss in'integraziun dad audios entras codes da QR el cudisch per saver trenar la pronunzia.

Duront la radunonza generala ha ei dau neginas ulteriuras propostas pil program da lavur 2021/2022.

10. Varia

Johannes Flury engrazia pils 6 davos onns. El hagi schazegiau la buna ed emperneivla collaboraziun. Tras siu presidi hagi el giu la pussevkladad d'emprender d'enconuscher meglier la Surselva. El hagi uss schizun festivau sias nozzas d'aur en Casa Caltgera en Surselva.

Martin Cabalzar dat igl impuls da ponderar davart novas inscripziuns da reconuschienscha el curtgin d'honor a Trun. En quei connex patratga el vid litterats piars sco Gion Deplazes, Vic Hendry, Theo Candinas, Gion Antoni Derungs ni era Matias Spescha. Las davosas inscripziuns mondien anavos sigl onn 2002, nua ch'ei seigi sco davos vegniu fatg omagi a Alois Carigiet. Il 2024 festiveschi la Ligia Grischa giubileum. Franc fussi quei in mument per in niev monument per las mummas romontschas.

Hermann Thom porta ils megliers salids dall'Uniun dals Grischs. Grazia alla tscherca pil niev president/ la(s) nova(s) presidenta(s) dalla Ligia Romontscha hagi dau in interessant inscunter denter las uniuns territorialas. Cun quei bien brat vegnien els era egl avegnir a cuntinuar.

Suenter ina davosa canzun dall'artista, Ester Deck, siara il president allas 21:30 la radunonza generala engraziand per il sustegn ed engaschi da tut ils presents ed alla vischnaunca da Flem per la hospitaliad.

Suenter la radunonza offerescha la vischnaunca politica da Flem in aperitiv.

Falera, ils 22 d'october 2021



Rita Bearth
actvara SR